



欽定歷代職官表

11

7 保
4544
6



4367
6



欽定歷代職官表卷十八
都察院表

左都御史

三	秦	御史大夫	
漢	御史大夫	御史中丞	御史大夫
後漢	御史中丞	御史大夫	御史中丞
三國	御史中丞	御史大夫	御史中丞
晉	御史中丞	御史大夫	御史中丞
宋齊	御史中丞	御史大夫	御史中丞
北魏	御史中丞	御史大夫	御史中丞
北齊	御史中丞	御史大夫	御史中丞
後周	御史中丞	御史大夫	御史中丞
隋	御史大夫	御史中丞	御史大夫
唐	御史大夫	御史中丞	御史大夫
五季	御史大夫	御史中丞	御史大夫
宋	御史大夫	御史中丞	御史大夫
遼	御史大夫	御史中丞	御史大夫
金	御史大夫	御史中丞	御史大夫
元	御史大夫	御史中丞	御史大夫
明	御史大夫	御史中丞	御史大夫

職官表卷十八 都察院表

廣雅書局

省其右都御史為總督坐銜右副都御史為巡撫坐銜俱無京員故都察院長官皆以左繫銜焉

吏科戶科禮科兵科刑科工科掌印給事中滿洲漢人各一人

給事中滿洲漢人各一人掌印給事初中制滿洲四品康熙二年改為七品六年復為四品九年定俱為正七品雍正七年升為正五品給事初中制從七品雍正七年均升為正五品

掌傳達

繪音稽考庶政吏科分稽銓衡注銷吏部順天府文卷戶科分稽財賦注銷戶部文卷禮科分稽典禮注銷禮部宗人府理藩院太常寺光祿寺鴻臚寺國子監欽天監文卷兵科分稽戎政注銷兵部太僕寺鑾儀衛文卷刑科分稽刑名注銷刑部通政使司大理寺文卷工科分稽工程注銷工

部文卷

國初沿明制六科自為一署順治十八年設滿洲漢人都給事中各一員滿洲漢人左右給事中各一員漢人給事中二員康熙四年六科止畱滿洲漢人給事中各一員餘俱省五年復增設掌印給事中滿洲漢人各一員雍正元年始奉

以六科隸都察院聽都御史考核焉

京畿河南江南浙江山西山東陝西湖廣江西福建四川廣東廣西雲南貴州十五道掌印監察御史滿洲漢人各一人江南道監察御史滿洲漢人各三人山東道監察御史滿洲漢人各二人京畿河南浙江山西陝西湖廣江西福建道監察御史滿

聯官表卷十八
五
洲漢人各一人初制滿洲漢軍三品順治十六年改爲七品康熙六年改爲四品九年復爲正七品雍正七年定以滿洲由員外郎漢軍由郎中升授漢人由內閣侍讀編修檢討郎中員外郎補授者爲正五品由中行評博行取知縣補授者爲正六品乾隆十七年俱改爲從五品

掌糾劾官邪條陳治道京畿道分理院事及直隸

盛京刑名稽察內閣順天府大興宛平縣河南道分理河南刑名照刷部院諸司卷宗稽察吏部詹事府步軍統領五城江南道分理江南刑名稽察戶部寶泉局左右翼監督在京十有二倉總督漕運磨勘三庫月終奏銷之籍浙江道分理浙江刑名稽察禮部都察院山西道分理山西刑名稽察兵部翰林院六科中書科總督倉場坐糧廳大通橋監督通州二倉山東道分理山東刑名稽察刑部太醫

院總督河道催比五城命盜案贖緝捕之事陝西道分理陝西刑名稽察工部寶源局覈勘在京工程湖廣道分理湖廣刑名稽察通政使司國子監江西道分理江西刑名稽察光祿寺福建道分理福建刑名稽察太常寺四川道分理四川刑名稽察鑾儀衛廣東道分理廣東刑名稽察大理寺廣西道分理廣西刑名稽察太僕寺雲南道分理雲南刑名稽察理藩院欽天監貴州道分理貴州刑名稽察鴻臚寺又八旗事務每歲以滿洲科道四員專司稽察一年又宗人府事務以宗室御史稽察內務府事務初設御史四員稽察後省今以協理陝西道掌貴州道滿洲御史二員兼管皆不爲專闕焉

職官表卷十八
國初設滿洲御史二員順治五年增置十七員康熙二十八年又增一員雍正五年始置宗室御史二員蒙古初置章京二員康熙元年省五十七年增置蒙古御史二員漢軍御史初置八員康熙三十九年省三員雍正初俱省統歸漢人額缺內補用漢人御史順治初置六十九員旋省二十九員康熙初又省十六員雍正四年增置八員乾隆十三年又省九員十四年定設滿洲漢人員額如今制宗室蒙古御史俱統于滿洲員額之數四十六年復增置宗室御史二人而省滿洲員額二人

謹案舊制御史分設十四道而以河南江南浙江山西山東陝西爲六掌道分稽在京諸司及各直省刑名河

南道仍參治院事京畿道惟司照刷卷宗六掌道各以二員或一員協理依次遞遷其他則謂之坐道皆不理本道之事惟存空銜而已乾隆十四年

特詔釐正按道定額各給印信而以職事分隸之名實相符規制始爲允稱二十年復

命以京畿道改列河南道之前俾互易所掌而官署亦從對換焉于是次序秩然益昭整肅矣至京畿河南二道員闕皆由長官掄選疏請

簡調各道掌印則以資深者遞轉其四川廣西廣東雲南貴州五道滿漢員額本各一人初制新授者卽補掌印今改定亦由江南等八道遞轉焉

經歷滿洲漢人各一人正六品 都事滿洲漢人各一人正六品

經歷掌董察吏胥都事掌繕寫章疏而行遣文書之事則兩廳分理之經歷初稱司務後改為經歷員額順治元年定都事初置滿洲二人漢軍一人康熙三十九年省漢軍員額乾隆十七年省滿洲都事一人改為滿洲漢人各一人

筆帖式滿洲三十五人蒙古二人漢軍五人六科筆帖式滿洲八十人職事見吏部篇

都察院筆帖式初置滿洲五十一人漢軍七人康熙三十八年省滿洲十有六人漢軍二人蒙古筆帖式雍正十二年置額六科筆帖式初置一百有七人乾隆二年省二十

七人其分隸之制堂筆帖式十人京畿道江南道各三人河南浙江山西山東陝西湖北廣江西福建四川廣東廣西雲南貴州道各二人吏科戶科兵科刑科各十有五人禮科工科各十人

巡察京通各倉科道十有四人請詳倉庫條 掌稽察在京祿米等十有二倉通州中西二倉覈其出納而禁其盜竊以釐剔弊端歲以十月引

見派往一年而代

巡視淮安漕務科道一人舊駐淮安今移瓜儀 巡視濟寧漕務科道一人

駐濟寧 巡視天津漕務科道一人舊駐天津今移楊村 巡視通州漕務科道

一人駐通州

職官表卷十八
掌催督糧運凡官吏須索稽留及旗丁私挾禁物者咸糾治之濟寧巡漕兼掌運河水道董察有司以時其疏濬焉
每歲十月奏請

簡派給

欽差官員關防以行事竣而納之

巡察

京科道滿洲一人巡察吉林黑龍江科道滿洲二人巡察臺灣科道滿洲漢人各一人

掌巡省風俗釐察奸弊考覈稽違凡地方興革事宜及吏治民情皆以實採訪而入

告焉

盛京巡察雍正三年置吉林黑龍江巡察雍正九年置初制每歲更代後改定俱五年掄遣一次臺灣巡察康熙六十年置初制亦每歲更代雍正五年以漢人巡察兼理臺灣學政乾隆十七年改定三年掄遣一次三年復

命屆期奏請應否派往均候旨以行

謹案各省巡按御史

國初承明舊制置自郎中以下各官皆得選任兼憲銜以行順治十八年定議永行停止又有巡江御史巡視屯田御史俱順治初停止督理茶馬御史康熙初停止又雍正三年設各省巡察以督捕盜賊由科道及小京堂

部屬各官掄遣江寧安徽共一人湖北湖南共一人山東河南共一人四年設直隸巡查御史順天及永平宣化二人保定正定河間二人順德廣平大名二人又有巡視山東河湖工務御史一員雍正元年置直隸巡農御史一員雍正七年置嗣俱先後停止謹附識于此

歷代建置上

此卷專敘都御史御史等官沿革

三代

周禮天官小宰之職掌建邦之宮刑以治王宮之政令凡

宮之糾禁

鄭康成註若今御史中丞

謹案漢御史中丞執法殿中與周官小宰掌宮刑以憲禁于王宮者相近故鄭氏援以為比謹著之于此以明

法官源流所自而其職本天官之貳故仍繫諸吏部表

內焉

周禮春官御史中士八人下士十有六人其史百有二十

人府四人胥四人徒四十人掌邦國都鄙及萬民之治令

以贊冢宰凡治者受灋令焉掌贊書凡數從政者

鄭康成註御猶

侍也進也

謹案周官御史次于內史外史之後蓋本史官之屬故杜佑以為非今御史之任然考其所掌如贊冢宰以出治令則凡政令之偏私闕失皆得而補察之故外內百官悉當受成法于御史實後世司憲之職所由出今仍繫之于表

呂祖謙大事記御史之名見于周官以中下士為之特小臣耳至於戰國其職益親故獻書多云獻書于大王御史秦趙澠池之會命御史書事淳于髡亦曰御史在後執法在傍是又掌記事糾察之任也

秦

荀勗辭尚書令表昔六官所掌冢宰為首秦公卿贊以丞相御史為冠

杜佑通典御史大夫秦官侍御史之率故稱大夫

章俊卿山堂考索秦置御史大夫以貳于相

晉書百官志御史中丞本秦官也

史記張蒼列傳秦時為御史主柱下方書索隱曰周秦皆有柱下史謂御

史也恆在殿柱之下

鄭樵通志法冠者秦始皇滅楚以其君冠賜御史亦名獬豸冠

謹案秦漢御史大夫史稱其掌副丞相故漢時名為兩

府辭宣傳簡在兩府師古曰丞相御史府也凡丞相有闕則御史大夫以次

序遷乃三公之任與今都御史之職不同自東漢省御

史大夫而以中丞為臺率始專糾察之任其後歷代或

復置大夫或但設中丞規制各殊要皆中丞之互名蓋

即今都察院堂官之職事矣然秦漢大夫雖未可當今

都御史而其官實御史之長故中丞稱御史大夫丞見漢

湯傳書張御史亦稱御史大夫史儀注且所掌在承風化典

職官表卷十八
法度辭宣傳御史大夫內承本朝之風化外佐丞相統理天下朱博傳御史大夫典正法度總領百官上下相本兼執憲之司又不可以擬今之協辦大學士職
監臨名所承權輿有在故仍繫之都察院表內焉

通典秦以御史監理諸郡謂之監察史案御史奉使巡察而戰國策稱安邑之御史實昉于秦之監郡則是六國時已有其制矣

漢

漢書百官公卿表御史大夫位上卿銀印青綬掌副丞相有兩丞秩千石一曰中丞在殿中蘭臺掌圖籍祕書外督部刺史內領侍御史十五人受公卿奏事舉劾案章成帝綏和元年更名大司空金印紫綬祿比丞相置長史如中丞官職如故哀帝建平二年復為御史大夫元壽二年復

為大司空御史中丞更名御史長史

通典漢時選郡守相高第為御史大夫任職者為丞相

李華御史大夫廳壁記秦官有御史大夫在漢為三公職副丞相相關則大夫遷或名司空或名舊號史足徵也議大政必下丞相御史其廷署古曰府近曰臺

王楙野客叢書鼂錯更令諸侯謹諱錯父從潁川來謂錯曰上初即位公為政用事云云如淳曰錯為御史大夫位三公也如淳意其父稱子為公蓋以此爾

太平御覽漢舊儀曰御史大夫寺在司馬門內門無塾門署用梓板題曰御史大夫寺謝維新合璧事類漢謂之御史臺亦謂之蘭臺寺

通典御史大夫有兩丞一曰御史丞一曰中丞亦謂中丞

爲御史中執法中丞居殿中察舉非法及御史大夫轉爲大司空而中丞出外爲御史臺率卽今之御史大夫任也李華御史中丞廳壁記御史亞長曰中丞貳大夫以領其屬漢儀大夫副丞相以備其闕參維國綱鮮臨府事故中丞專焉

程大昌雍錄漢百官表御史中丞在殿中蘭殿西京賦曰蘭臺金馬遞宿迭居案此蘭臺正在殿中石渠天祿皆在殿北○漢則直在殿中中丞皆以未有外臺時爲準而名官以中也御史臺常與祕書爲隣唐世藏書皆具數申御史臺蓋故則也

吳仁傑兩漢刊誤補遺百官表御史大夫更名大司空置長史如中丞官職如故刊誤曰多一如字仁傑曰此言是也表稱御史大夫有兩丞一曰中丞在殿中蘭臺掌圖籍祕書外督部刺史內領侍御史十五人受公卿奏事舉劾案章案鼂錯爲御史大夫謂丞史云云如涪曰丞史丞及史也表載丞不載史漢紀始有之一曰中丞外督部刺史一曰內史掌祕書受公卿奏事舉劾案章然則表有缺文者矣督部刺史下當云一曰內史內領侍御史今缺四字置長史下當云省內史中丞官職如故今缺三字衍一字不然有兩丞而止著其一兩丞之外復置長史非缺則贅其義安在

謹案前漢御史大夫非今都御史說已具前至御史中

丞雖掌糾察而所居在殿中蘭臺爲宮掖近臣亦與今副都御史有異至成帝以後中丞出居外臺其職始視今之都察院矣又百官表稱漢御史有兩丞而所載僅止中丞沈約宋書始以御史丞當其一然考之漢書多稱中丞閒有單稱御史丞者如班書嚴延年傳事下御史丞按驗范書黃琬傳事下御史丞王暢以事核之皆卽中丞之省文減宣傳上言稍遷御史及丞下言爲御史及中丞二十載此卽其證蓋行文者詳畧互見並非別爲一官且考辭宣傳稱宣爲御史中丞執法殿中外總部刺史陳咸傳稱咸爲御史中丞總領州郡奏事課第諸刺史內執法殿中所掌皆在督察州郡刺史而並

不言其受公卿奏事故史記三王世家所載大司馬上疏其受以奏未央宮者有御史臣光之名而不及中丞說詳通政司篇吳仁傑據漢紀以爲當作內史其說似不爲無所本也

應劭風俗通御史中丞舊治書侍御史也

冊府元龜孝宣感路溫舒言秋季後請讞時帝幸宣室齋居而決事令侍御史二人治書治書御史起于此後因別置與符節郎共平廷尉奏罪當其輕重

太平御覽漢官儀曰侍御史周官也爲柱下史冠一名曰柱後以鐵爲之其審固不撓也或說古有獬豸獸主觸邪佞故執憲者以其角形爲冠耳

職官表卷十八
通典漢舊儀曰漢御史員四十五人皆六百石其十五人給事殿中爲侍御史宿廬在石渠門外二人尙璽四人持書給事二人侍前中丞一人領錄三十人留寺理百官事漢書蕭望之傳注如淳曰漢儀注御史大夫史員四十五人皆六百石其十五人給事殿中其餘三十人留寺治百官事皆冠法冠

謹案漢自成帝以後中丞爲御史臺率其職實如今之都御史而治書侍御史二人掌以法律當天下奏讞定其是非參主臺事猶其初之有兩丞則亦當如今副都御史之職也至御史在漢雖有殿中及留寺之分然皆歸大夫及中丞統屬故尹齊傳稱齊爲御史事張湯董

賢傳稱孔光爲御史大夫時賢父恭爲御史事光蕭望之至使守史護視家事而鮑宣傳稱宣擢辱丞相事下御史中丞侍御史至司隸官欲捕從事云云蓋亦因中丞承詔治宣獄故使侍御史往捕則侍御史之得聽中丞差委亦槩可見矣

通典漢有御史主簿

漢書孫寶傳張忠爲御史大夫署寶爲主簿

漢書武帝本紀御史乘屬在廟旁如淳注漢儀注史亦有屬

漢書嚴延年列傳以選補御史掾舉侍御史

漢書蕭望之列傳少史冠法冠蘇林注少史曹史之下者也

謹案漢御史臺主簿及掾當如今之經歷都事等官而御史屬獨不詳其秩位考匈奴傳載祁連欲引兵還御史屬公孫益壽諫以爲不可擢益壽侍御史是其職亦當與掾相近蓋是時田廣明以御史大夫爲祁連將軍故得以其屬行其言御史屬者乃御史大夫之屬非侍御史也漢書所云丞相御史及制詔御史者皆指御史大夫史家省文往往如是耳

漢書百官公卿表侍御史有繡衣直指出討姦猾治大獄武帝所制不常置

漢書王訢列傳繡衣御史暴勝之持斧逐捕盜賊元后列傳王賀爲武帝繡衣御史逐捕魏郡羣盜

唐六典惠帝三年相國奏御史監三輔不法事凡九條

馬端臨文獻通考漢惠帝初置御史監三輔其後又置監御史漢官儀曰侍御史出督州郡賦稅運漕軍糧

漢書胡建列傳監軍御史與護軍諸校列坐堂皇上

謹案御史出使至西漢而漸多如繡衣直指監郡督運監軍之類皆以事專行正如今巡漕巡察諸差之比其他隨時奉遣者尙屢見于史如食貨志載分遣御史卽治郡國緡錢宣帝紀載黃龍元年詔御史察計簿霍光傳載侍御史五人持節護喪事皆非常例而收縛罪人亦多以侍御史爲之

劉輔傳上使侍御史收繫輔谷永傳上使侍御史收永朱雲傳御史

將雲蓋因其給事殿中職居親近故事之重且急者往

往使之銜命耳又叔孫通傳載長樂宮置酒御史執法
舉不如儀者輒引去無敢謹譁失禮者則又今糾儀之
職所自始矣

〔通典〕後漢初廢御史大夫至建安十三年罷三公官始復
置之以郤慮居焉不領中丞置長史一人

〔後漢書百官志〕御史中丞一人千石本注曰御史大夫之丞也舊別監御史在殿中密舉非法及御史大夫轉為司空因別置中為御史臺率後又屬少府治書侍御史二人

六百石本注曰選明法律者為之凡天下諸職疑事掌以法律當其是非侍御史十五人

六百石本注曰掌察舉非法受公卿羣吏奏事有違失舉劾之凡郊廟之祠及大朝會大封拜則二人監威儀有違失則劾奏蘭臺令史六百石本注曰掌奏及印工文書

〔洪适隸釋〕巴郡太守張納碑五府表君中丞督缺二字武汾

〔法〕所向禽殪日不移晷收功獻捷車騎將軍馮緄碑御史
中丞督使揚徐二州討賊范宏朱生徐鳳馬勉張嬰等幽

州刺史朱暉碑于時益州蠻夷侵寇邊郡陸梁山野為害
日甚朝廷以君能缺二字武缺二字御史中丞討彼亂畧君統

整羣帥方謀並設威神霆電燭于上下至缺二字郡缺二字授
首

〔後漢書宣秉列傳〕光武特詔御史中丞與司隸校尉尚書
令會同並專席而坐故京師號曰三獨坐

謹案後漢書馬援傳稱馬嚴拜侍御史中丞當以其為
侍御史之長故又有此稱也至中丞督兵討捕盜賊已
見于前漢成帝時迫東京而其事尤多范史所載如馮

職官表卷十八
緄以御史中丞將兵督揚州九江諸郡軍事盛修以御
史中丞募兵討長沙零陵賊不一而足今督撫之兼都
御史副都御史銜其制蓋權輿于此矣

〔通典〕治書御史選御史高第者補之自桓帝之後無所平
理充位而已侍御史以公府掾屬高第補之或以故牧守
議郎郎中爲之順帝後絕他選專用宰士有三缺三府各

一
〔冊府元龜〕侍御史二漢所掌凡五曹一曰令曹掌律令二
曰印曹掌刻印三曰供曹掌齋祀四曰馬曹掌殿馬五曰
乘曹掌護駕

謹案前漢御史多以刀筆吏積勞得之後漢如以公府

掾屬選補蓋卽如今由部屬保舉之例而後漢書載司
徒劉愷辟韋豹謂之曰今歲垂盡當選御史意在相薦
子其宿留則選舉之期又當在每歲冬月矣至後漢侍
御史有出使安集州縣者杜詩傳爲侍御史安集洛陽
是也有主從駕行幸平治道路者章帝紀帝東巡狩勅
侍御史方春毋得有所伐殺虞延傳駕經封邱城門門
小不容羽蓋帝怒使撻侍御史蓋卽所謂乘曹之職是
也有出督軍旅者高彪傳第五永爲督軍御史使督幽
州桓典傳典爲侍御史奉使督軍破賊是也有慰撫屬
國者李恂傳拜侍御史持節使幽州宣布恩澤慰撫北
狄是也有監護東宮者种暲傳順帝時爲侍御史監護

太子是也有使典喪事者楊賜傳賜卒使侍御史持節送喪蘭臺令史十人發羽林騎輕車介士是也而郭憲傳又稱執法奏為不敬章懷太子注執法糾劾之官是

御史亦可稱執法殆如中丞之為中執法歟伏湛傳注王莽改御史曰執法其名蓋起於此

〔通典〕後漢譙元為繡衣御史持節分行天下沈約云繡衣御史光武省順帝復置

謹案譙元本傳元以中散大夫為繡衣使者並非御史且其事在平帝元始四年亦非後漢也杜佑此條徵引殊誤

三國

〔三國蜀志〕向朗列傳朗子條景耀中為御史中丞

〔雍錄〕魚豢魏畧載辟夏之言曰蘭臺為外臺祕書為內閣此時御史所掌祕籍已不在禁中矣故命為外臺

〔冊府元龜〕魏文帝黃初二年又以御史大夫為司空改中丞為宮正後皆復舊名侍御史八人又置治書執法掌奏劾治書侍御史但掌律令

〔宋書百官志〕魏置御史八人有治書曹掌度支運課第曹掌考課不知其餘曹也

〔通典〕魏蘭臺遣二御史居殿中察非法即殿中侍御史之始也

〔三國魏志杜襲列傳〕文帝踐阼襲為督軍糧御史更為督

軍糧執法

〔三國魏志明帝本紀〕黃初七年遣治書侍御史荀禹慰勞邊方景初元年冀充徐豫四州民遇水遣侍御史循行沒溺開倉賑救之

〔冊府元龜〕吳亦有御史大夫孫休永安元年命大將軍孫繼領之後又置左

右御史大夫五年以廷尉丁密光祿勳孟宗分為之

〔三國吳志〕是儀列傳拜侍中中執法平諸官事

〔三國吳志〕薛綜列傳綜子瑩孫皓初為左執法胡綜傳拜偏將軍兼

左執法

〔三國吳志〕陸凱列傳凱弟允始為御史

〔三國吳志〕樓元列傳孫休時為監農御史

謹案蜀吳官制史志有闕今採列傳所載以補其畧至吳之中執法左執法其職較崇當亦即中丞之改名也

晉

〔冊府元龜〕晉初罷大夫因漢制以中丞為臺主

〔李華御史中丞廳壁記〕晉宋元魏以還無御史大夫由是

中丞威望愈尊禮有加等

〔通典〕晉亦因漢以中丞為臺主與司隸分督百僚自皇太

子以下無所不糾初不得糾尚書後亦糾之晉傳咸奏云司隸中丞得

糾太子而不得糾尚書臣所未譬朝廷無以易之中丞專糾行馬內司隸專糾行

馬外雖制如是然亦更奏眾官實無其限

〔晉書職官志〕晉置治書侍御史四人泰始四年又置黃沙

獄治書侍御史一人秩與中丞同掌詔獄及廷尉不當者皆治之後并江南遂省黃沙治書侍御史及太康中又省治書侍御史二員○侍御史員九人品同治書而有十三曹吏曹課第曹直事曹印曹中都督曹外都督曹媒曹符節曹水曹中壘曹營軍曹法曹筭曹及江左初省課第曹置庫曹後分置外左庫內左庫云○殿中侍御史晉置四人江左置二人又案魏晉官品令又有禁防御史第七品孝武太元中有檢校御史吳琨則此二職亦蘭臺之職也〔葉夢得石林燕語〕自晉魏以來凡入殿奏事官以御史一人管殿門外搜索而後許入謂之監搜御史立藥樹下至唐猶然太和中始罷之

〔趙彥衛雲麓漫鈔〕東晉時有檢校御史專掌行馬外事以吳琨爲之

〔晉書孝武帝本紀〕太元六年正月初置督運御史官
宋齊梁陳

〔宋書百官志〕御史中丞掌奏劾不法秩千石治書侍御史掌舉劾官品第六已上分掌侍御史所掌諸曹若尙書二丞侍御史掌察舉非法受公卿奏事有違失者舉劾之太祖元嘉中省外左庫世祖大明中復置順帝初省營軍併水曹省筭曹併法曹吏曹不置御史凡十御史焉
〔南齊書百官志〕御史中丞一人治書侍御史二人侍御史十人

隋書百官志御史臺梁國初建置大夫天監元年復曰中丞置一人掌督司百僚治書侍御史二人分統侍御史侍御史九人居曹掌知其事糾察不法殿中御史四人掌殿中禁衛陳承梁皆循其制官

謹案治書侍御史自應劭已比之中丞魏晉以後分統侍御史沈約謂若尚書二丞則其職事更崇今故繫之副都御史表內至治書或作持書或作侍書考太平御覽引風俗通有舊注國諱改焉後歷代皆同九字當係唐人原本所題蓋唐避高宗諱改治爲持又譌作侍也今並從漢書本文作治字焉

又案江左諸朝中丞獨專論劾之責羣臣得罪多有以

失糾免官者

南史蔡廓傳謝靈運殺人御史中丞王淮之坐不糾免官

故每不能久

于其位劉休傳載休爲中丞啟言宋世載記六十歷斯任者五十有三校其年月不過盈歲是也又當時條制亦往往與前代較異如王僧虔傳稱甲族由來不居憲臺殆恐其有所瞻徇而然又到洽傳稱舊制中丞不得入尚書下舍洽兄溉爲左戶尚書至刺省詳決始許入省則不知其何故矣

北魏

魏書官氏志御史中尉第三品上治書侍御史第五品上侍御史殿中御史從第五品中又高祖復次職令御史中尉從第三品治書侍御史第六品侍御史第八品殿中侍

御史從第八品檢校御史第九品

謹案魏李彪爲御史中尉而洛陽伽藍記又載高祖舉酒曰三三橫兩兩縱誰能辨之賜金鐘御史中丞李彪曰沽酒老嫗甕注瓦屠兒割肉與稱同然則當時雖改中丞爲中尉而中尉仍通稱中丞也

〔徐堅初學記〕侍御史後魏八人殿中侍御史後魏置十四人檢校御史後魏置十二人

〔魏書官氏志〕天興四年九月罷外蘭臺御史總屬內省

〔通典〕後魏御史甚重必以對策高第者補之侍御史與殿中侍御史書在外臺受事夜則番直內臺御史舊式不隨臺主簡代延昌中王顯有寵于宣武爲御史中尉始請革

選此後踵其事每一中尉則更簡代御史

〔魏書韋纘列傳〕遷侍御史中散高道悅列傳少爲中書學生侍御主文中散

謹案治書侍御史宋齊其任稍輕至梁復重其選通典謂後魏掌糾禁內朝會失時服章違錯饗宴會見悉所監之則其職亦次于中尉故魏書李彪傳載李冲劾彪表稱輒集治書侍御史臣酈道元等以彪所犯罪狀訊其虛實云云蓋時彪方爲中尉彪旣被罪故臺官卽以道元爲首也至侍御中散主文中散二官不見于官氏志而由此可轉御史殆亦掾史之屬如今之經歷都事歟

又案北魏亦有監軍御史畢祖彥傳以侍御史為元法僧監軍及出使徵

兵高道悅傳車駕南征徵兵秦雍期秋季闋集洛陽使者治書御史薛聰等稽遲期會與典治喪

事者王肅傳遣侍御史一人監護喪事大抵多沿前代之制至巡察州

郡雖無專職而高聰傳稱聰為并州刺史再為御史舉

奏張纂傳稱纂為樂陵太守多所受納聞御史至棄郡

逃走則是乘傳糾察者亦時有其事矣

北齊

〔隋書百官志〕後齊御史臺掌糾察彈劾中丞一人治書侍

御史二人侍御史八人殿中侍御史檢校御史各十二人

錄事四人

〔謝維新合璧事類〕御史臺自齊梁皆謂之南司梁及後魏

北齊或謂之南臺

謹案南臺之名不始于梁據南史王曇首傳載宋元嘉

四年車駕出北堂使三更開廣莫門南臺不肯開左丞

羊元保奏免中丞傅隆又袁凱傳有南臺御史王道隆

沈文季傳有南臺御史賀咸則自宋齊已有此稱矣

後周

〔冊府元龜〕後周六官之建改中丞為司憲中大夫御史臺

為司憲屬秋官府置司憲上士二人中士人數旅下士八

人

〔通典〕後周有司憲中大夫掌司寇之法辨國之五禁

隋

隋書百官志高祖受命置御史臺大夫二人治書侍御史二人侍御史八人殿內侍御史監察御史各十二人錄事二人御史始自吏部選用仍依舊入直禁中煬帝即位多所改革御史臺增治書侍御史為正五品省殿內御史員增監察御史員十六人加階為從七品開皇中御史直宿禁中至是罷其制又置主簿錄事員各二人侍御史惟掌侍從糾察其臺中簿領皆治書侍御史主之

通典隋以國諱改中丞為大夫

初學記隋室諱中省中丞增治書御史之品以代之

謹案隋以中丞為大夫而治書侍御史專主簿領以為之貳至唐復改治書為中丞自是而後大夫即漢魏中

丞之職中丞即漢魏治書御史之職名雖遞易而實則無殊也至漢御史給事中號稱近職故後漢書載侍御史何敞上疏至有臣謬預機密之語見鄧壽傳嗣後雖代有變更而蘭臺猶屬內省自隋煬帝罷直宿之制于是御史始專隸外臺矣

通志隋大業三年始置主簿二人兼置錄事一人案通志作錄事

一人與隋書異疑有誤

唐

唐六典御史大夫一人從三品中丞二人正五品掌邦國刑憲典章之政令以肅正朝列侍御史四人從六品下令史十五人書令史二十五人掌糾舉百僚推鞠獄訟主簿

職官表卷十八
一人從七品下錄事二人從九品下掌印及受事發辰勾
檢稽失殿中侍御史六人從七品上令史八人書令史十
人掌殿廷供奉之儀式監察御史十人正八品上令史三
十四人掌分察百僚巡按郡縣糾視刑獄肅整朝儀
李華御史大夫廳壁記距義寧至先天登宰相者十二人
以本官參政者十三人故相任者四人藉威聲以稜徼外
按戎律者八人官或改稱大司憲臺或分爲左右肅政罷
置不恆從其宜也開元天寶中刑措不用元元休息由是
務簡益重地清彌尊任難其人多舉勳德至宰輔者四人
宰輔兼者一人故相任者一人兼節度者九人異姓封王
者二人

新唐書百官志高宗改治書侍御史爲中丞以避帝名龍
朔二年改御史臺曰憲臺大夫曰大司憲中丞曰司憲大
夫武后文明元年改御史臺曰肅政臺

唐會要光宅二年改爲左肅政臺專管在京百司及監軍
旅更置右肅政臺其職員一准左臺令按察京城外文武
僚神龍元年改爲左右御史臺景雲三年廢右臺先天二
年又置右臺尋又廢

趙璘因話錄高宗朝改門下省爲東臺中書省爲西臺尚
書省爲文昌臺故御史臺呼爲南臺南朝同也武后朝御
史臺有左右肅政之號當時亦謂之左臺右臺則憲府未
曾有東西臺之稱惟俗間呼在京爲西臺東都爲東臺李

聯官表卷十八
三
栖筠爲御史大夫後人不名者呼爲西臺又不知出何故事豈以其名上栖字遂呼之耶

舊唐書職官志會昌二年十二月勅大夫掌邦國刑憲肅正朝廷其任既重品秩宜峻准六尚書例陞爲正三品中丞爲憲臺長陞爲正四品下與丞郎出入選用著之于令顏真卿與右僕射定襄郡王郭英乂書宰相御史大夫兩省五品供奉官自爲一行

劉肅大唐新語李承嘉爲御史大夫謂諸御史曰公等奏事須報承嘉知不然無妄聞也諸御史悉不稟之承嘉厲而復言監察蕭至忠徐進曰御史人君耳目俱握雄權豈有奏事先咨大夫臺無此例設彈中丞大夫豈得奉諮耶

承嘉無以對

通典中丞二人亦時有內供奉本有一人聖歷中加一職人尋省先天中復置副大夫通判臺事

謹案唐代節鎮多加御史大夫銜其入爲本官則謂之知臺事代宗紀以浙西觀察使蘇州刺史御史大夫李涵知臺事是也其大夫闕官而中丞攝事者則謂之知大夫事資治通鑑御史中丞知大夫事李嗣真是也至唐世以中丞爲次對官胡三省通鑑注宰相對延英既退常參官得引對者以次宰相之後故今制三品以上惟副都御史日次對

奏事宮門得以綠頭牌簽名進

呈與尚書都御史侍郎同蓋猶其舊制也

大唐新語宋璟則天朝以頻論得失內不能容而憚其公正乃勅璟往揚州推按奏曰臣以不才叨居憲府按州縣乃監察御史事耳今非意差臣不識其所由請不奉制無何復令按幽州都督屈突仲翔璟復奏曰御史中丞非軍國大事不當出使且仲翔所犯贓污耳今高品有侍御史卑品有監察御史今勅臣恐非陛下意當有危臣者請不奉制月餘優詔令副李嶠使蜀嶠喜召璟曰叨奉渥恩與公同謝璟曰恩制示禮數不以禮遣璟璟不當行謹不謝乃上言曰臣以憲司位居獨坐今隴蜀無變不測聖意令臣副嶠何也恐乖朝廷故事請不奉制

唐會要開元二十二年置京畿採訪處置使以中丞爲之

柳宗元河東集中丞壁記今之制受命臨戎無所統屬者謂之使開元以來其制愈重故取御史之名而加焉至于今若干年其兼中丞者若干人皆得以壯其威張其聲其用遠矣

謹案唐自開元置採訪使始以中丞兼之其後爲節度觀察刺史者多兼大夫中丞之號以至幕府參佐僚屬皆以御史爲之謂之外臺此卽後世行臺之制所自昉也

舒元興御史臺新造中書院記若御史臺每朝會其長總領屬官謁于天子道路誰何之聲達于禁扉至含元殿西廡使朱衣從官傳呼促百官就班遲曉文武臣僚列于兩

觀之下使監察御史二人立于東西朝堂甬道以監之雜人報點監者押百官由通乾象人宣政門及班于殿庭則左右巡使二人分押于鐘鼓樓下若兩班就食于廊下則又分殿中侍御史一人爲之使以莅之內謁者承旨喚仗入東西閣門峨冠曳組者皆趨而進分監察御史二人立于紫宸屏下以監其出入爐烟起天子負斧展聽政自螭首龍池南屬于文武班則侍御史一人盡得專彈舉不如法者

〔因話錄〕御史臺三院一曰臺院其僚曰侍御史眾呼爲端公見宰相及臺長則曰某姓侍御知雜事謂之雜端見臺長則曰知雜侍御雖他官高秩兼之其侍御號不改見宰相則曰知雜某姓某官臺院非知雜者乃俗號散端二曰殿院其僚曰殿中侍御史眾呼爲侍御見宰相及臺長雜端則曰某姓殿中最新入知右巡已次知左巡號兩巡使所主繁劇及遷向上則又入推益爲勞屑惟其中間則入清閑故臺中彥曰免巡未推只得自如言其暢適也廳有壁畫小山水甚工云是吳道元真跡三曰察院其僚曰監察御史眾呼亦曰侍御見宰相及臺長雜端則曰某姓監察若三院同見臺長則通曰三院侍御而主簿紀其所行之事每公堂食會雜事不至則無所檢轄惟相揖而已雜事至則盡用憲府之禮雜端在南揖主簿在北揖兩院則分坐雖舉匕飭皆絕談笑食畢則主簿持黃卷揖曰請舉

事于是臺院白雜端曰舉事欲上堂三院長各于會堂南廊下先白雜端云合舉事

則舉曰某姓侍御更有姓同者則以第行別之有某過謀

准條主簿書之其兩院皆如此若舉時差錯則最小殿中舉院長

最小侍御史舉殿院長又錯則向上人迺舉若雜端失笑則三院皆

笑謂之烘堂悉免罰矣凡見黃卷罰直遇赦悉罰臺長到

諸院凡官吏所罰亦悉免御史虛三院雖至美而月滿殿

中推鞠之勞憚于轉兩院以向下侍御史便領推也多不

願為以此臺中以殿中轉兩院為戲謔之辭每出入行步

侍御史在柱裏殿察兩院在柱外有時殿中入柱裏則共

哈之曰著去也三院御史主簿有事白端公就其廳若有

中路白事謂之參端參端有罰殿中已免巡過正知巡者

假故則向上人又權知謂之蘸巡臺官有親愛除拜喜慶

之事則謁院長雜端臺長謂之取賀凡此皆因胥徒走卒

之言遂成故事院長每上堂了各報諸御史皆立于南廊

便服鞞鞋以俟院長立定院長方出相揖而序行至殿院

門揖殿中又序行至食堂門揖侍御史凡入門至食凡數

揖大抵揖者古之肅拜也臺中無不揖其酒無起謝之禮

但云揖酒而已酒最合敬以恐煩卻損往往自臺拜他官

執事亦誤作臺揖人皆笑之每赴朝序行至待漏院偃息

則有臥揖上門有馬揖凡院長在廳院內御史欲往他院

必先白決罰又必先白察院有都廳院長在本廳諸人皆

會話于都廳亦白御史初上後遇雜端上堂則舉三愆九失儀意緣是新入欲併罰出未遇雜端

上堂其犯舊 察院南院會昌初監察御史鄭路所葺禮祭

條並不罰 廳謂之松廳南有古松也刑察廳謂之麗廳寢于此多麗

兵察常主院中茶茶必市蜀之佳者貯于陶器以防暑溼

御史躬親緘啟故謂之茶瓶廳吏察主院中入廟人次第

名籍謂之朝簿廳吏察之上則館驛使館驛使之上則監

察使監察使同僚之冠也謂之院長臺中敬長三院皆有

長察院風采尤峻凡三院御史初拜未朝謝先謁院長院

長辭疾不見則不得及上矣

趙彥衛雲麓漫鈔唐有三院御史侍御史謂之臺院殿中

侍御史謂之殿院監察御史謂之監院

趙璠石墨鐫華唐御史臺碑陰題名碑陰題侍御史并內

供奉侍御史并內供奉監察御史共六百餘人

通典侍御史之職有四謂推推者手也彈掌彈公廨知公廨事雜

事臺事悉總判之定殿中監察以下職事及進名改轉臺內之事

悉主之號為臺端知雜者謂之雜端最為雄劇殿中侍御

史遷轉及職事與侍御史相亞自開元以來權歸侍御史

而遷轉猶同號為副端監察御史職知朝堂正門無籍非

因奏事不得入至殿庭在西鳳闕南侍至開元七年勅始

並令隨仗入閣

新唐書百官志又置御史裏行使侍御史裏行使殿中裏

行使監察裏行使以未為正官無員數

大唐新語初馬周以布衣直門下省太宗就命監察裏行

俄拜監察御史裏行之名自周始也

〔通典〕侍御史內供奉與殿中御史內供奉監察御史裏行其制並同皆無職田庶僕

謹案唐宋三院御史今惟存監察御史其侍御及殿中職事均已歸併察院掌轄以唐制準之雜端獨主臺務正如今京畿道代堂辦事之比副端則當如今之河南道至御史裏行諸官不爲正員則又如

國朝初制之有試御史也

〔李嶠〕請每十州分置御史巡按疏陛下創置右臺分巡天下自非分州統理無由濟其繁務請大小相兼率州置御史一人以周年爲限使其親至屬縣或入閭里督察姦訛

觀採風俗然後可以求其實效課其成功

〔王應麟〕玉海唐監察御史十道巡按以判官二人爲佐務繁則有支使開元中兼巡傳驛大厯十四年號館驛使監察御史分察尚書省六司由下第一人爲始出使亦然興元元年以第一人察吏部禮部兼監察使第二人察兵部工部兼館驛使第三人察戶部刑部歲終議殿最元和中以新人不出使無以觀能否乃命顯察尚書省號六察官開元十九年以監察御史二人莅太倉左藏庫其後以殿中侍御史上一人爲監太倉使第二人爲監左藏庫使〔唐會要〕武后時初置兩臺每年春秋發使春日風俗秋日廉察令地官尚書韋方質爲條例制定爲四十八條以察

州縣自載初以後奉勅乃巡不每午出使

謹案唐之監太倉使乃今巡倉御史之職館驛使乃今巡察御史兼查驛站之職分察尚書省乃今御史稽查各部院衙門之職而十道巡按則今巡察御史亦向其遺意也

〔大唐新語〕唐九徵爲御史監靈武軍時吐蕃入寇蜀漢九徵出永昌郡千餘里討之累戰皆捷加朝散大夫侍御史
〔通志〕隋末亦遣御史監軍唐垂拱三年十一月鳳閣侍郎韋方質奏言舊制有御史監軍武太后曰將出師君授之斧鉞闔外之事皆使裁之比來御史監軍乃有控制軍中大小之事皆須承稟非所以委專征也

謹案漢時朱黽馮緄之流皆以御史中丞出軍然非監軍也止胡建傳有監軍御史之名隋唐仍沿其制

〔通志〕主簿唐武德末杜淹爲御史大夫以吏部主事林懷信爲之貞觀中自張宏濟爲此官後遂爲美職

五季

〔五代史梁本紀〕乾化三年御史大夫姚洎李琪列傳唐明宗卽位以琪爲御史中丞

〔五代會要〕御史大夫後唐天成元年六月以李琪爲特進行御史大夫自後不除○晉天福五年二月以御史中丞爲清望正四品

〔五代史盧導列傳〕事梁爲侍御史知雜事和凝列傳唐天

成中為殿中侍御史李澤列傳事梁為監察御史裴羽列傳事梁為御史臺主簿

五代會要晉開運二年八月勅御史臺准前朝故事以郎中員外一員兼侍御史知雜事近年停罷獨委年深御史知雜振舉之司紀綱未峻宜遵故事庶協通規宜于郎署中選清慎強者兼御史知雜事

五代會要御史臺六員監察謂之分察使

謹案五季臺官亦依三院舊制謹畧採五代史紀傳及王溥會要以補志文之闕

五代會要一臺司除御史中丞隨行印及左右巡使監察使並出使印等外其御史臺印一面先准合式即是主簿

監臨近年以來緣無主簿遂至內彈御史權時主持又常隨本官出入不定伏緣臺中公事不同諸司動繫重難常虞雷滯當申奏申堂之際及牒州府之時事無輕重並使此印今准合式逐日有御史一員臺直承受制勅公文其御史臺印今後欲勒雷臺中不令在外選差令史一人帖司一人同知此印凡有諸色大案印發之時准指揮諸司各置印歷

宋

宋史職官志御史臺掌糾察官邪肅正綱紀大事則廷辨小事則奏彈中丞一人為臺長侍御史一人掌貳臺政殿中侍御史二人掌以儀法糾百官之失監察御史六人掌

職官表卷十八
分察六曹及百司之事檢法一人掌檢詳法律主簿一人
掌受事發辰勾稽簿書

〔文獻通考〕宋承唐制有三院大夫無正員止爲兼官中丞
除正員外或帶他官者尙書則曰某官兼御史中丞丞郎
則曰御史中丞兼某官給事中諫議則曰某官權御史中
丞事次有知雜御史一員副中丞判臺事

〔李壽續資治通鑑長編〕御史臺自辟奎後中丞缺人不補
侍御史知雜事韓億獨掌臺務者踰年天聖四年始命王
臻權御史中丞

〔石介徂徠集〕御史府不與他府並舊有大夫則中丞亞大
夫而領其屬今大夫闕則中丞其長也故中丞之任特重

中丞之責九重焉

〔陸游老學庵筆記〕故事臺官無侍經筵者賈文元公爲中
丞仁祖以其精於經術特召侍講延英自此遂爲故事

〔葉夢得石林燕語〕元豐旣新官制職事官未有不經除者
惟御史大夫未嘗除人蓋臺諫之長非宰相所利故無有
啟之者崇寧中朱聖子嘗請除竟不行

〔合璧事類舊制〕三院多出外任風憲之職用他官領之太
平興國三年以張選爲監察御史正名舉職自此始也唐
制御史不專言職至天禧中始置言事御史唐朝有御史
裏行至景祐中始置以處御史之官卑者唐臺案有六監
司元豐三年李定請復六察于是以御史專領六察

御史臺言請以吏部及審官東西院三班院隸吏察戶部
三司及司農寺隸戶察刑部大理寺審刑院隸刑察兵部
 武學隸兵察禮祠部太常寺隸
 禮察少府將作等隸工察從之其後大正官名不除大夫
 檢校官帶憲銜者亦除去自國初至元豐中檢校官多帶
 憲銜有檢校御史大夫者至是
 罷以中丞為長知雜御史為侍御史言事官為殿中侍御
 史六察官為監察御史舊以中丞兼理檢使殿中侍御史
 兼左右巡使監察御史兼監察使至是使名悉罷

〔玉海〕開寶四年邊光範兼判御史臺公事興國四年侯雋
 權中丞雍熙三年趙昌言以知制誥正為中丞端拱二年
 右諫議王化基權中丞始定班制正衙常參立中丞轉位
 內殿起居立本班咸平五年五月溫仲舒以禮書為中丞
 天禧元年右丞趙安仁兼安仁請給御寶印麻書三院糾

彈事祥符七年九月知雜王隨請兩制撰重修御史臺記
 國朝大夫止為兼官中丞除正官外帶他官次有知雜侍
 御史又有左右巡使分糾違失監察使掌祠祭廊下使掌
 入閣食監香使掌行香謂之五使有四推臺殿開寶六年
 九月馮炳為侍御史知雜判臺事十月雷德驥分判三院
 初三院多出外任興國三年命張巽為監察始正名舉職
 天禧元年二月八日丁丑始置言事御史侍御史以下六
 員不兼領職務其後久不除慶厯五年正月乙亥以殿中
 梅摯監察李京並為言事御史今中丞廳之南有諫官御
 史廳蓋御史得兼諫職也唐制御御史不專言職景祐元年
 四月二十四日置御史裏行舉三丞歷知縣者為之從中

職官表卷十八
丞韓億之言也元豐二年李定請復六察十二月丙午從之以御史專領二年四月二十七日詔六察官以所糾多寡爲殿最中書置簿以時書之五月二日增置臺主簿一員十一月六日詔御史六員三分察三言事六年正月二十四日都司置御史房六月乙巳朔詔六察各置一御史九月二十四日置檢法官八年十月丁丑詔監察兼言事殿中兼察事用呂公著劉摯之言也元豐正名不除大夫檢校官亦除去以中丞爲長知雜爲侍御史言事爲殿中侍御史六察爲監察御史使名悉罷二年十二月六日詔御史臺重修一司勅五年六月十四日詔尙書省得彈奏六察失職紹興元年九月侍御史沈與求請舉元豐六察舊法乾道二年三月十五日詔非歷兩任縣令不除監察非任守臣不除郎官著爲令

〔文獻通考〕御史臺置推直官四人專治獄事元豐時悉罷謹案宋初以知雜御史副中丞判臺事及元豐改制遂以侍御史爲中丞之貳當時雖名三院其實侍御史班位特崇蓋近今副都御史之職任也至六察之制則今御史之稽查各衙門者實爲監察舊職其來久矣

〔石林燕語〕故事臺官皆御史中丞知雜與翰林學士互舉其資任須中行員外郎以下太常博士以上曾任通判人未歷通判非特旨不薦仍爲裏行此唐馬周故事也議者頗病太拘難以應格熙寧初司馬君實爲中司已請稍變

舊制及呂晦叔繼爲中司遂薦張戩王子韶二人皆京官也既而王荆公驟用李資深以秀州軍事判官特除太子中允權監察御史裏行命下宋次道當制封還詞頭已而次命李才元蘇子容皆不奉詔蓋謂旋除中允而命猶自選人而除也三人皆謫卒用資深近歲有差遣合用京官特改官而除者自資深始也

王栾燕翼詒謀錄仁宗重臺諫之選景祐元年四月癸丑詔御史臺置殿中侍御史監察御史裏行又詔舉三丞以上嘗歷知縣人除御史裏行二年除御史又二年除三司開封判官自清要而歷繁劇選任既重一時號稱得人宋史職官志乾道二年詔自今非曾經兩任縣令不得除

監察御史

謹案宋以縣令選授御史明代行取之制蓋本于此

歐陽修歸田錄御史臺故事三院御史言事必先白中丞自劉子儀爲中丞始榜臺中今後御史有言不須先白中丞

文獻通考天禧中兩省置諫官六員御史臺置御史六員並不兼領職務其或詔令乖當官曹涉私措置失宜刑賞踰制并令諫官奏論憲臣彈舉每月須一員奏事或有急務亦許非時入對

方勺泊宅編虞經臣策元祐五年作監察御史是時察官亦許言事尋擢侍御史不歷殿院至紹聖改元移起居郎

職官卷一
明年遂爲給事中

謹案泊宅編謂虞策由監察御史擢侍御史不歷殿院則當時監察御史擢侍御史必由殿院明矣大唐新語載宋璟之言曰高品有侍御史卑品有監察御史然則監察御史擢侍御史以最卑擢最高中間必由殿院唐宋制同也

〔朱翌猗覺寮雜記〕外臺見唐高元裕傳故事三司監院官帶御史者號外臺得察風俗舉不法監院屬三司如楊子院是也皆財貨轉易之地故今監司亦號外臺皆以察風俗舉不法劉夢得和南海馬大夫云漢家旌旆付雄才百粵南溟統外臺以馬總帶御史大夫也

謹案歷代本別有諫議大夫屬門下省以主諫諍而御史則專以糾察非違爲職自宋眞宗置言事御史許之論列時政而臺諫始合爲一然元豐初制以殿中爲言事官監察爲六察官猶各有司存其後復令其互兼御史遂盡得建言不專彈劾逮金元以後而諫議之官遂廢亦臺臣積重之勢然也

遼

〔王圻續文獻通考〕遼南面官有御史臺太宗會同元年置其官曰御史大夫曰御史中丞曰侍御史

謹案遼制有侍御史而無殿中監察蓋三院職事併於一也

金

〔金史百官志〕御史臺御史大夫從二品掌糾察朝儀彈劾
 官邪勘鞫官府公事御史中丞從三品貳大夫侍御史二
 員從五品掌奏事判臺事治書侍御史二員從六品掌同
 侍御史殿中侍御史二員正七品每遇朝對立于龍墀之
 下專劾朝者儀矩監察御史十二員正七品掌糾察內外
 非違刷磨諸司察帳并監祭禮及出使之事參注諸色人
 員承安四年十員承安
 五年兩司各添十二員典事二員從七品架閣庫管勾一
 員從八品檢法四員從八品

〔金史選舉志〕宣宗南遷嘗以御史巡察興定元年以縣官
 或非材監察御史一過不能備知遂令每歲兩遣監察御

史巡察仍別選官巡訪以行黜陟之政

〔元好問中州集〕史肅入為監察御史遷治書楊慥拜監察
 御史遷侍御史

謹案金時臺殿二院多由察院遷轉中州集傳可證與
 唐宋之制畧同

元

〔元史百官志〕御史臺大夫二員從一品中丞二員正二品
 侍御史二員從二品治書侍御史二員從二品掌糾察百
 官善惡政治得失至元五年始立臺設官七員大夫中丞
 侍御史治書侍御史典事檢法獄丞七年改典事為都事
 十九年罷檢法獄丞二十七年始置經歷一員皇慶元年

增中丞爲三員二年減一員至治二年大夫一員後定置御史大夫二員中丞二員侍御史二員治書侍御史二員經歷一員從五品都事二員正七品照磨一員正八品承發管勾兼獄丞一員正八品架閣庫管勾兼承發一員正九品掾史一十五人譯史四人知印二人通事二人宣使十人臺醫二人蒙古書寫二人典史六人庫子二人其屬有二○殿中司殿中侍御史二員正四品至元五年始置秩正七品後陞正四品凡大朝會百官班序其失儀失列則糾罰之知班四人通事譯史各一人○察院秩正七品監察御史三十二員司耳目之寄任刺舉之事至元五年始置御史十一員悉以漢人爲之八年增置六員十九年增置一十六員始參用蒙古人爲之至元二十二年參用南儒二人書吏三十二人○江南諸道行御史臺統江東江西浙東浙西湖南湖北廣東廣西福建海南十道陝西諸道行御史臺統漢中隴北四川雲南四道設官品秩同內臺

〔馬燧察院題名記〕世祖皇帝至元五年立御史臺設監察御史振肅庶官糾劾貪邪

謹案御史臺自唐置三院侍御史卽稱臺院在殿中監察之上宋則以侍御史貳臺政次于中丞而三院名目猶存金沿其制復以侍御史治書御史同判臺事元時增秩至二品于是遂爲堂上官而臺屬僅存殿中察院

殿中又止有二員明初因省其官以糾儀之事併入察院而別置副都僉都以當中丞侍御治書之職歷代規制至此一變其由來蓋亦有漸也至江南陝西行御史臺顧炎武謂即明在內道長在外按臺之法然其職在統制各道憲司與內臺究有差別今故別詳于督撫表內焉

明

明史百官志初吳元年置御史臺設左右御史大夫從一品御史中丞正二品侍御史從二品治書侍御史正三品殿中侍御史正五品察院監察御史正七品經歷從五品都事正七品照磨管勾正八品以鄧愈湯和為御史大夫劉基章溢為御史中丞

洪武九年汰侍御史及治書殿中侍御史十年七月詔遣監察御史巡按州縣十三年專設左右中丞正二品左右侍御史正四品尋罷御史臺十五年更置都察院設監察都御史八人秩正七品分監察御史為浙江河南山東北平山西陝西湖南福建江西廣東廣西四川十二道各道置御史或五人或三四人秩正九品每道鑄印二一畀御史久次者掌之一藏內府有事受印以出既事納之文曰繩愆糾繆以秀才李原明詹徽等為都御史吳荃等為試監察御史試御史一年後實授又有理刑進士理刑十六年陞都察院為正三品設左右都御史各一人正三品左右副都御史各一人正四品左右僉都御史各二人正五品經

歷一人正七品知事一人正八品十七年陞都御史正二品副都御史正三品僉都御史正四品十二道監察御史正七品建文元年改設都御史一人革僉都御史二年改為御史府設御史大夫改十二道為左右兩院止設御史二十八人成祖復舊制永樂元年改北平道為北京道十九年罷北京道增設雲南貴州交趾三道洪熙元年稱行在都察院同六部又定巡按以八月出巡宣德十年罷交趾道始定為十三道正統中去行在字嘉靖中以清屯增副都御史三人尋罷隆慶中以提督京營增右都御史三人尋亦罷其屬經歷司經歷一人正六品都事一人正七品務廳司務二人從九品初設四人後革五人照磨所照磨正八品檢校正九品

品司獄司從九品初設六人後革五人各一人十三道監察御史

一百十人正七品浙江江西河南山東各十人福建廣東廣

西四川貴州各七人陝西湖廣山西各八人雲南十一人

其在外加都御史或副僉都御史銜者有總督有提督有

巡撫有總督兼巡撫提督兼巡撫及經畧總理贊理巡視

撫治等員

王圻續文獻通考明改前代御史大夫中丞為都御史臺

為都察院是以察而統為公署之號也以監察御史分設

十三道革去侍御史殿中侍御史諸名銜而糾劾巡按照刷

問擬之任一切責之監察是以察而統為憲臣之號也

邱濬大學衍義補今六部官屬皆書其部如吏部屬則曰

職官表卷十八
吏部文選清吏司兵部屬則曰兵部武選清吏司之類是也唯監察御史則書其道而不繫於都察院焉

明史百官志十三道監察御史巡視倉場在外巡按巡漕各以其事專監察而巡按則代天子巡狩所按藩服大臣府州縣官諸考察舉劾尤專大事奏裁小事立斷按臨所至表揚善類翦除豪蠹以正風俗振綱紀

明會要宣德九年差御史一員巡視在京倉一員巡視通州倉嘉靖八年題准每年差御史一員請勅提督京通二倉收放糧斛兼理通惠河事務隆慶元年差御史一員前往浙江及南直隸蘇松常鎮四府監兌糧米催償運船兼理濟寧迤南一帶河道三年停差五年復差御史一員同

戶部郎中一員催趨萬厯六年革催趨郎中專差御史

謹案自明太祖改御史臺爲都察院併唐宋三院御史爲一廣置言官原欲責其隨時獻替乃仁宣以後臺綱日弛往往借端聚訟逞臆沽名而一二大臣又或援引私人藉爲牙爪朋黨之漸已開及神宗失德怠荒令諸臣得以直言自銜至于絞訐摩上儕偶難堪神宗厭其譁囂一切畱中不下諸臣明知封章之不復進御更肆譁張遇事生風競以把持朝局爲得計其始則爭並封爭挺擊舉國若狂猶曰託詞忠愛繼而爭京察爭考選則全主于引同惡而排異己于是有齊楚浙黨三方鼎峙之日相與齟齬正人挾制閣部愛憎嗜省日起戈矛

職官表卷十八
神宗既黑白不分惟臺章所攻其人即自引去諸臣益
得恣行己意吏部亦畏其恐喝悉視指擣盤踞日深黨
禍日熾馴至魏闡擅政其中宵人敗類方且列名彪虎
助之搏擊清流剝傷元氣不旋踵而明社已墟口舌之
痾實其亡徵之先見者也我

國家肅清綱紀百度惟貞臺臣咸知凜守官箴恪共奉法
我

皇上屢頒

訓諭諄復告誡于明季臺諫惡習詳悉剖示尤為深切著明

仰誦

綸言無不益加警惕矣

南海桂銘球初校

益陽蔡芳覆校

番禺陶福祥再覆校

欽定歷代職官表卷十八

職官表卷十八 都察院上

廣雅書局

欽定歷代職官表卷十九

都察院下

歷代建置下

六科給事 國朝定制隸都察院已詳具上卷官制內此卷專敘歷代沿革

三代 未置

秦

晉書職官志給事中秦官也

謹案給事設官雖始於秦而考晏子外篇云偏柎寄於路寢得為地下之臣擁札操筆給事宮殿中右陛之下願以某日送未得君之意也則是給事宮殿擁札操筆已肇後世給事之職矣

漢

漢書百官公卿表給事中亦加官所加或大夫博士議郎

掌顧問應對位次中常侍漢官解詁云掌侍從左右無員常侍中

冊府元龜漢儀注曰諸給事中日上朝謁平尚書奏事分

為左右以有事殿中故曰給事中多名儒國親為之掌左

右顧問

杜佑通典給事中加官也秦置漢因之位次中常侍侍中

黃門無員漢東京省

謹案給事中在秦漢為加官初無員數漢書所載曾膺

此職者如韋賢匡衡蕭望之劉向魏相孔霸平當張禹

龔勝谷永金敞金欽梁邱賀杜延年終軍東方朔蔡義

夏侯勝丙吉師丹辛慶忌張猛蔡千秋之類甚眾考其

本職或以博士或以謁者或以諫大夫或以前將軍或

以右將軍或以宗正或以大中大夫或以光祿大夫或

以御史大夫或以關內侯蓋皆如今之

內廷行走而非其官號故自兩府九卿中二千石二千石

以至比六百石皆得為之與齊隋以降設為額闕者不

同然所掌在平尚書奏事則後來封駁之任亦已權輿

於此矣

後漢書桓譚列傳宋宏薦譚拜議郎給事中

後漢書鄭眾列傳永平中辟司空府以明經給事中再遷

越騎司馬復留給事中

謹案通典稱東京省給事中而列傳尚屢見其職疑其

初亦嘗承長安舊制章帝以還始行省廢通典蓋據其後而言之耳

三國

通典魏代復置給事中或為加官或為正員

謹案據杜佑所言則給事中在曹魏時已有正員然考三國志裴松之注所載如邯鄲涪蘇林俱以博士給事中虞松之以中書令給事中皆有本職是魏世亦當如漢制但為加官矣

晉

晉書百官志給事中魏世復置至晉不改在散騎常侍下給事黃門侍郎上無員

唐六典晉氏無加官亦無常員隸散騎省位次散騎常侍晉令云品第五武冠絳朝服

歐陽詢藝文類聚東晉集曰員外侍郎及給事冗從皆是帝室茂親或貴游子弟

謹案晉給事中設有定品冊府元龜載武帝授張建陳邵二詔俱不言以某官給事中可知並非加官是給事中之為正員實自晉始也至漢魏以後尚有給事黃門侍郎應劭所謂日暮入對青瑣門拜謂之夕郎者即指此官而言其位本在給事中之下至隋去給事之名但稱黃門侍郎其後遂為三省長官而給事中反在其下迨三省既罷其官已久廢不置今所存者獨給事中而

已乃世俗相沿猶以夕郎為給事中故事殊考之未審矣

宋齊梁陳

唐六典給事中宋齊隸集書省位次諸散騎下奉朝請上梁陳秩六百石品第七

通典宋齊給事中隸集書省梁陳亦掌獻納省諸間奏

宋書百官志給事中無員

謹案南史王韶之傳稱韶之徵為祠部尚書加給事中是宋世亦以為加官也

南齊書百官志給事中奉朝請皆集書省職置正書令史朝散用衣冠之餘人數猥積永明中奉朝請至六百餘人

謹案漢時給事中已多用名儒國親為之如韋賢匡衡以經術劉向以宗室金敞金欽以勳戚皆由此入侍禁中然所擇尚能得人也至晉而專用貴游漸失初意故冊府元龜所引束皙集又有若悉從高品則非本意若精鄉議則必有損之語此四語藝文類聚未引餘俱相同其冗濫可以概見及南齊而人數更多殆由不置員額故除授者眾未為高選歟

隋書百官志梁集書省有給事中掌侍從左右獻納得失省諸奏聞文書意異者隨事為駁陳承梁皆循其制官

謹案唐以後給事中杜佑謂用隋之職然觀隋志所載梁制則駁正違失其職掌亦不始于隋也

北魏

〔魏書官氏志〕給事中給事從第三品上中給事從第三品中太和二十三年改制中給事中從第五品給事中從第六品

〔唐六典〕後魏史闕其員初從第三品上太和末從第六品上

〔魏書楊播列傳〕父懿為選部給事中播為北部給事中

〔魏書李安世列傳〕選主客給事中

〔魏書李冲列傳〕遷內祕書令南部給事中

謹案北魏有中給事中給事中給事之名其品第亦分高下正如明制之有都左右也其時固已設為正闕而

〔魏書鄭義傳〕載義為太常卿加給事中太和以後太常第三品而得下兼從第六品是魏世亦有加官矣至魏之給事史不言隸何省而選部給事中北部給事中主客給事中南部給事中志亦均失載其名殆各以職事而為區別耳

北齊

〔通典〕北齊給事中亦隸集書省凡六十人

〔唐六典〕北齊集書省署給事中六十員從第六品上

〔隋書百官志〕後齊集書省掌諷議左右從容獻納給事中六人

謹案自秦漢以後給事中並無員額其設為定闕實自

北齊始然考唐六典通典皆作六十人獨隋志作六人多寡不同疑隋志傳刊脫誤也

後周

唐六典後周天官府置給事中士六十人掌理六經及諸文志給事于帝左右其後六官之外又別置給事中四人通典後周官品正二命天官給事中士

隋

隋書百官志高祖受命置門下省有給事二十人掌部從朝直開皇六年吏部又別置給事郎散官番直常出使監檢煬帝即位移吏部給事郎名為門下之職位次黃門下置員四人從五品省讀奏案

唐六典隋初置給事中二十人煬帝名給事郎減置四人從第五品

謹案給事中歷代多隸集書省至隋始定為門下之官而省讀奏案正與今鈔發本章相近則六科職掌所治亦本于隋代也

唐

舊唐書職官志給事中四員正五品上隋曰給事郎置四員位次黃門侍郎武德定令曰給事中龍朔改為東臺舍人咸亨復掌陪侍左右分判省事凡百司奏鈔侍中審定則先讀而署之以駁正違失凡制勅宣行大事則稱揚德澤褒美功業覆奏而請施行小事則署而頒之凡國之大獄三司詳決若刑名不當輕重或失則援法例

退而裁之或發驛遣使則審其事宜與黃門侍郎給之其緩者給傳卽不應給罷之凡文武六品已下授職官所司奏擬則校其仕歷淺深功狀殿最訪其德行量其才藝若官非其人理失其事則白侍中而退量焉若宏文館圖書之繕寫讎校亦課而察之凡天下冤滯未申及官吏刻害者必聽其訟與御史中書舍人同計其事宜而申理之錄事四人從七品上主事四人從八品下令史十一人書令史二十二人甲庫令史七人傳制八人亭長六人掌固十人修補制勅匠五人

趙璘因話錄北省班諫議在給事中上中書舍人在給事中下

程大昌竅錄等之其爲兩省焉高下固有定序而立班之時諫議在給事上者有爲爲之也會昌二年牛僧孺等奏曰六典諫議在隋從五品下今正五品上自大厯開升門下中書侍郎爲正三品兩省遂闕四品望升諫議爲正四品以補其闕詔從其奏則是諫議班乎給事之上者偶因大厯閒四品闕官而從五品越取諫議充入四品以補其闕也以品敘班故諫議越立給事之上也然而班雖暫上而其進遷之序猶仍舊不改于是方爲諫議則班乎給事之上以其嘗從五品而升補四品故也及其進遷則諫議復在給事之下以其官品同在五品而位序在下故也此上坡下坡之詳也至周顯德五年勅諫議依舊正五品上

班在給事下其說曰諫議雖升班給事之上及其遷拜官雖敘遷位則降等故改正焉

通典唐改給事郎為給事中前代雖有給事中之名非今任也今之給事中蓋因秦之名用隋之職

馬端臨文獻通考有侍中給事中之官而未嘗司宮禁之事是名內而實外也唐以來以侍中為三公唐以處勳臣之臣為之並不預宮中之事

白居易長慶集給事中之職凡制勅不便于時者得封奏之刑獄有未合于理者得駁正之天下冤滯無告者得與御史糾理之有司選補不當者得與侍中裁退之率是而行號為稱職

新唐書百官志凡百司奏鈔侍中既審則給事中駁正違

失詔勅不便者塗竄而奏還謂之塗歸李藩列傳藩遷給事中制有不便就

勅尾批卻之吏驚請聯它紙藩曰聯紙是牒豈得云批勅耶

田錫論軍國機要朝廷大體疏臣又讀唐書見給事所得以封駁詔書封謂封還詔書而不行駁謂駁正詔書之所失

謝維新合璧事類晏公類要貞元中上命盧杞為饒州刺史給事郎袁高宿直當草制遂執以謁宰相宰相不悅遂改命舍人草制案此則給事宿直亦草制耶當考

謹案唐制凡詔旨及百司奏疏由中書宣出者皆當經給事中書讀然後付外奉行今中外奏章既上

旨下內閣者日以給事中一人詣閣祇領備錄其副以授所司卽其例也惟草制乃中書舍人事不關給事中故袁高不肯爲盧杞作詔謝維新頗以爲疑然考六典稱中書進畫事繁或以諸司官兼者謂之兼制詰通鑑載高此事謂宰相改命它舍人爲之旣曰它舍人足知高所行者實舍人之事其殆以給事中而兼司詔命者歟

五季

五代史張允列傳廢帝皇子重美爲河南尹掌六軍以允剛介乃拜允給事中爲六軍判官

五代史賈緯列傳緯除知制誥累遷中書舍人諫議大夫給事中復爲修撰漢隱帝時詔與王仲寶儼等同修晉高

祖出帝漢高祖實錄

謹案五季臺省雖沿舊制然多不舉其職據二傳所載給事中大抵皆兼他官非能專司封駁之任也

宋

宋史職官志給事中四人分治六房掌讀中外出納及判後省之事若政令有失當除授非其人則論奏而駁正之凡章奏日錄日以進考其稽違而糾治之故事詔旨皆付銀臺司封駁官制行給事中始正其職而封駁司歸門下元豐五年五月詔給事中許書畫黃不書草著爲令六月給事中陸佃言三省密院文字已讀者尚令封駁慮失之重複詔罷封駁房六月詔駁正事赴執政稟議七年有旨

舉駁事依中書舍人封還詞頭例既而令稟議如初給事中韓忠彥言給舍職位頗均一則不稟白而聽封還一則許舉駁而先稟議於理未允且朝廷之事執政所行職當封駁則已與執政異自當求決于上尚何稟議之有詔從之紹聖四年葉祖洽言兩省置給舍使之互察今中書舍人兼權封駁則給事中之職遂廢詔特旨書讀不迴避餘互書判元符三年翰林學士曾肇言門下之職所以駁正中書違失近日給事封駁中書錄黃乃令舍人書讀行下隳壞官制有損治體願正紀綱爲天下後世法重和元年給事中張叔夜言凡命令之出中書宣奉門下審讀然後付尚書頒行而密院被旨者亦錄付門下此神宗官制也

今急速文字不經三省而諸房以空黃先次書讀則審讀殆成虛設矣乞立法禁從之凡分案五曰上案主寶禮及朝會所行事曰下案主受發文書曰封駁案主封駁及試吏校其功過曰諫官案主關報文書曰記注案主錄起居注其雜務則所分案掌焉紹興以後止除二人或一人合壁事類會要淳化四年以右諫議大夫魏庠知制誥柴成務同知給事中事凡制勅有所不便宜準故事封駁九年詔停廢知給事封駁公事自是始以封駁司隸銀臺王秣燕翼貽謀錄唐朝職掌因五季之亂遂至錯亂或廢不舉給事中掌封駁不可一日無皇朝淳化四年太宗皇帝推考廢職始于唐末乃命魏庠柴成務同知給事中未

幾隸銀臺通進司為封駁司陳恕乞鑄印命取門下印用

之因改其名為門下封駁司

事始除為職事官

〔王應麟〕王海元豐官制門下增設後省以左散騎常侍左

諫議大夫左司諫左正言給事中為門下後省設案六建

炎三年詔諫院別置局不隸兩省又因舊制置門下後省

以給事中為長官四員為額掌封駁書讀設案四

謹案宋初給事中皆以他官兼之自元豐改制始有專

職其後復置門下外省以給事中為長官則已別為一

曹故其官不隨省俱廢又唐時中書舍人分署尚書六

六百五十七

曹事宋則以給事中分治六房明之分給事中為六科
其源蓋本於此也

又案唐宋臺諫為兩官臺則侍御史殿中御史監察御

史諫則諫議大夫左右拾遺補闕左右司諫正言諫議大夫

秦漢以來皆用之屬門下省拾遺補闕唐垂拱中始置宋端拱初改為司諫正言俱分隸兩省掌侍從

規諫宋世亦稱為諫院而臺官則專主糾劾官邪各分

職守宋真宗詔亦有令諫官奏論憲臣彈舉之文洪邁

容齋隨筆謂臺諫官例不往來相見蓋職事各殊故諫

官御史得以互相糾駁也至給事中雖與諫議同居門

下而其職但主封駁書讀亦與諫議不同自後世不置

三省而諫議司諫正言之在門下者隨之俱廢諫院已

久無其官明初立制復以其職併入於科道故邱濬有
給事中實兼前代諫議補闕拾遺之語見大學衍義補而流俗
相沿遂稱御史為臺諫給事中為給諫亦殊未考設官
之本制矣

葉夢得石林燕語舍人於中書事皆得於檢後通書押而
給事中則但書錄黃而已舒道信為給事中以為言王文
恭為相時以白上神宗曰造令與行令職分宜別給事中
不當書草遂著為令

岳珂愧郈錄唐李藩在瑣闥以筆塗詔謂之塗歸國朝嚴
重此制銀臺既設封駁亦許繳奏元豐改官名門下省則
有給事中中書省則有中書舍人然中興以後三省合為

一均為後省封還或同銜則曰未敢書讀書行否則析之
其辭止此而已珂案典故元祐四年五月乙酉權給事中
梁燾繳蒲宗孟知虢州及胡宗回范鏐孫升杜天經等放
罪罰金指揮其駁文皆曰所有錄黃謹具封還伏乞聖慈
特付中書省別賜取旨施行語意乃與今異以時考之蓋
官制既行分省治事謹審覆揆議之訓故其制如此耳
李心傳建炎以來朝野雜記紹興二年韓世忠賞功文字
給事中賈安宅除工部侍郎門下後省闕官乃詔檢正李
與權書讀此事亦前所未有

遼

遼史百官志給事中聖宗統和二二年見給事中郭嘏

〔王圻續文獻通考〕遼南面門下省有給事中次于散騎常侍

金

〔金史百官志〕給事中從五品屬宣徽院

〔金史選舉志〕承安四年勅宰臣曰凡除授恐未盡當今無門下省雖有給事中而無封駁司若設之使于擬奏未授時詳審得當然後授之可也乃立審官院凡所送令詳審者以五日內奏或申省

謹案金世立諫院置左右諫議大夫左右司諫左右補闕拾遺等官而無門下省以主封駁故給事中獨無所掌至別設審官院以代其職與歷代不同然門下省既

廢仍置給事中一官其原實自金始也

元

〔元史百官志〕給事中秩正四品至元六年始置起居注左右補闕掌隨朝省臺院諸司凡奏聞之事悉紀錄之如古左右史十五年改陞給事中兼修起居注左右補闕改為左右侍儀奉御兼修起居注皇慶元年陞正三品延祐七年仍四品後定置給事中兼修起居注二員右侍儀奉御同修起居注一員左侍儀奉御同修起居注一員令史一人譯史一人通事兼知印一人

謹案唐宋給事中與起居郎同為門下省官而宋給事中所掌五案其一曰記注案則主錄起居注元以給事

中兼修起居注蓋治宋制也明凡日朝科員輪班一人立殿左右珥筆記旨亦猶記注之任今制記注官以翰

林充詳見起居注表凡

御門聽政則記注官四人自階西升立

御榻之右而給事中御史滿漢各二人以次侍立階下凡章疏之出科者鈔發既畢以所奉

諭旨及原疏別錄二通敬謹校對鈐蓋印信一送內閣曰史書一貯科垣曰錄書職掌所存視前代益為詳慎矣

明

〔明史職官志〕吏戶禮兵刑工六科各都給事中一人正七品左右給事中各一人從七品給事中吏科四人戶科八人禮

科六人兵科十人刑科八人工科四人並從七品掌侍從規諫

補闕拾遺稽察六部百司之事凡制勅宣行大事覆奏小事署而頒之有失封還執奏凡內外所上章疏下分類鈔

出參署付部駁正其違誤吏科凡吏部引選則掌科同至御前請旨外官領文憑皆先赴科畫字內外官考察自陳

後則與各科具奏拾遺糾其不職者戶科監光祿寺歲入金穀甲字等十庫錢鈔雜物與各科兼蒞之皆三月而代

內外有陳乞田土隱占侵奪者糾之禮科監訂禮部儀制凡大臣曾經糾劾削奪有玷士論者紀錄之以核贈諡之

典兵科凡武臣貼黃誥勅本科一人監視其引選畫憑之制如吏科刑科每歲二月下旬上前一年南北罪囚之數

歲終類上一歲蔽獄之數閱十日一上實在罪囚之數皆
憑法司移報而奏御焉工科閱試軍器局同御史巡視節
慎庫與各科稽查寶源局而主德闕違朝政得失百官賢
佞各科或單疏專達或公疏聯署奏聞雖分隸六科其事
屬重大者各科皆
得通奏但事屬某
科則列某科為首凡日朝六科輪一人立殿左右珥筆記
旨凡題奏目附科籍五日一送內閣備編纂其諸司奉旨
處分事目五日一注銷覈稽緩內官傳旨必覆奏復得旨
而後行鄉試充考試會試充同考官殿試充受卷官冊封
宗室諸藩或告諭外國充正副使朝參門籍六科流掌之
遇決囚有投牒訟冤者則判停刑諸旨凡大事廷議大臣
廷推大獄廷鞫六掌科皆預焉明初統設給事中正五品

後數更其秩與起居注同洪武六年設給事中十二人秩正七

品始分為六科每科二人鑄給事中印一推年長者一人

掌之九年定給事中十人十年隸承勅監十二年改隸通

政司十三年置諫院左右司諫各一人正七品左右正言各

二人從七品十五年又置諫議大夫以兵部尚書唐鐸為之尋皆罷二

十二年改給事中為源士增至八十一人初魏敏卓敬等
凡八十一人為

給事中上以其適符古元士之數改為元
士至是又以六科為士之本源改為源士未幾復為給事

中二十四年更定科員每科都給事中一人正八品左右

給事中二人從八品給事中共四十人正九品各科分設
員數如前

所建文中改都給事中正七品給事中從七品不置左右

給事中增設拾遺補闕成祖初革拾遺補闕仍置左右給

聯官表卷十九
事中亦從七品尋改六科置於午門外直房蒞事六科衙門舊在磚門內尚寶司西永樂中災移宣德八年增戶科給事中午門外東西每夜一科值宿專理黃冊

孫承澤春明夢餘錄洪武十七年九月給事中張文輔言自九月十四日至二十一日八日之間內外諸司奏劄凡一千六百六十計三千二百九十一事上諭廷臣曰朕日總萬幾豈能一一周徧苟政事有失宜豈惟一民之害將為天下之害卿等能各悉心封駁則庶事自無不當此六科稽查號件封駁章奏之例也

夏言桂洲奏議六科額設都左右給事中給事共五十八員中間事有煩簡故員有增損然以司諫諍備獻納則六科之職均也祖宗以來額員俱備後來乃有不盡補者然遇都左右給事中缺五員以上則必奏請陞補各科給事中缺十五六員以上則必奏請選補永著為例又凡給事中中有缺止於進士年三十以上者考選奏補宏治間始以行人博士兼選正德間始以在外推官知縣照御史例選補正德六年大臣畏忌新進敢言乃始盡廢進士考選之例

謹案給事在秦漢本加官其後置為正員或屬集書省或屬門下省規制不一明初不設門下省嘗以給事中屬之通政司後遂自為一曹稱六科都給事中凡章疏案牘得與部院衙門平列迨其末季廷論紛囂科道

雖並為言官實則黨援相持務彼此攻擊以求勝春明
夢餘錄載管志道疏謂拾遺一節六科拾御史之已陞
者一人則十三道亦拾給事中之已陞者一人迹似調
停實爭門戶臺垣水火即此而大槩可知特御史尚聽
考察于堂官而給事中以無所隸屬益得恣情自肆如
趙興邦在兵科至以紅旗督戰敢干預兵事機宜侵撓
國政其流弊復何所底止我

朝初設六科尚沿明制未遑釐正

世宗憲皇帝特命改隸都察院整綱飭紀班序秩然體統益昭
嚴肅洵當萬世恪遵之令典也

欽定歷代職官表卷十九

太倉錢清詒初校

益陽蔡芳覆校

番禺陶福祥再覆校

欽定歷代職官表卷二十

五城表

巡視五城御史	
	三代秦漢
	後漢三國晉
	<small>宋齊梁陳</small> 北魏
	北齊後周隋
	唐
	五季宋
	遼金
	元
	明

左右巡御史 左右巡使 都左右巡使

左右巡使

巡城御史

職官表卷二十 五城表

廣雅書局

五城兵馬司指揮

長安府	長安府
洛陽府	洛陽府
建康府	建康府
河南府	河南府
鄴縣	鄴縣
坊主	坊主
長安城	長安城
萬年城	萬年城
開封府	開封府
廂使	廂使
臨安府	臨安府
北廂使	北廂使
管公事	管公事
都警巡	都警巡
左右大	左右大
使	使

副指揮

司權	司權
長安府	長安府
洛陽府	洛陽府
建康府	建康府
河南府	河南府
鄴縣	鄴縣
坊主	坊主
長安城	長安城
萬年城	萬年城
開封府	開封府
廂使	廂使
臨安府	臨安府
北廂使	北廂使
管公事	管公事
都警巡	都警巡
左右大	左右大
使	使

五城表

廣雅書局

御史每城各一人雍正元年改定每城二人

初以漢軍歸併漢人班內

後復改定漢軍御史及漢人籍隸大興宛平者俱不開列巡城又初制有五城筆帖式後

省

五城兵馬司指揮漢人各一人

正六品

副指揮漢人各一人

正七品

吏目漢人各一人

末八流

掌緝捕逃盜糾逃姦非初制指揮專掌人命檢驗之事而以副指揮吏目分治各坊乾隆三十一年移東南西北四城副指揮於朝陽永定阜成德勝諸門外鈐轄關廂而城內事宜則以吏目專治各鑄關防條記以授之惟中城如舊副指揮每城初設二員順治十五年各省一員初俱由吏部揀補乾隆二十七年御史戈濤奏准以西北二城事

務繁劇遇有缺出於中東南三城調補二十八年副都御

史張映辰以調補乏人奏請仍復舊制

歷代建置

三代

周禮地官司虢十肆則一人司稽五肆則一人司虢掌憲市之禁令禁其鬪鬪者與其虢亂者出入相陵犯者以屬游飲食于市者若不可禁則搏而戮之司稽常巡市而察其犯禁者與其不物者而搏之掌執市之盜賊以徇且刑之

謹案地官司市掌辨物平價之政令今已別繫之順天府表內至司虢司稽雖出司市所辟除而鄭康成謂司

職官表卷二十一
四
馮掌禁暴亂司稽察雷連不時去者其職在除姦止隱
與今坊官爲近又其員數以十肆五肆爲率分地而治
亦頗同今五城之制故特託始於二職焉

秦無考

漢

〔杜佑通典〕漢長安有四尉分爲左右部後漢洛陽有四尉
東南西北四部主盜賊案察姦宄

〔馬端臨文獻通考〕長安四尉城東南置廣部尉是爲左部
城西北置明部尉是爲右部並四百石黃綬大冠主追捕
盜賊伺察姦非

〔後漢書百官志〕漢官曰雒陽孝廉左尉四百石孝廉右

尉四百石

〔後漢書橋元列傳〕元舉孝廉補洛陽左部尉

〔三國魏志太祖本紀〕舉孝廉爲郎除洛陽北部尉裴松之
註太祖初入尉解繕治四門造五色棒縣門左右有犯禁
者皆棒殺之京師斂迹莫敢犯者

謹案王圻作續文獻通考以司隸校尉爲五城所自出
蓋因其督察姦宄事頗相近然司隸官本列卿統轄郡
縣糾察百官其位任隆重實當如今步軍統領之職非
五城之但莅治都邑者可比考之史傳漢時輦轂政禁
實以長安雒陽二縣主之如董宣爲雒陽令擒湖陽公
主奴卽如今五城之捕治匪棍也祝良爲雒陽令案太

尉龐參夫人殺子事卽如今五城之究驗命案也橋元
少子被劫雒陽令圍守其家卽如今五城之承捕盜賊
也孫程等徙封遠縣勅雒陽令促期發遣卽如今五城
之遞送罪人也而長安雒陽四尉分左右部治事則尤
與今司坊官規制相合蓋兩漢都城皆專統於京兆河
南尹而今則五城與大興宛平二縣畫界分治五城以
京營所轄爲界兩縣以在外營汛所轄爲界故五城專
治京師卽漢長安雒陽之職守源委實屬相承今以畿
令爲京縣正官未可析載仍入順天府表內而五城兵
馬司則以左右部尉當之庶於官制爲適準焉

漢書趙廣漢列傳廣漢爲京兆尹奏請令長安游徼獄吏

秩百石其後百石吏皆差自重不敢枉法妄繫留人

漢書尹賞列傳賞守長安令部戶曹掾史與鄉吏亭長里
正父老伍人雜舉長安中輕薄少年惡子悉籍記之分行
收捕

後漢書周紆列傳紆徵拜雒陽令京師肅清黃門郎竇篤
從宮中歸夜至止茲亭亭長霍延遮止篤篤蒼頭與爭延
遂拔劍擬篤肆詈恣口篤以表聞詔收紆送廷尉數日貫

出
李固傳固暴尸城北弟子郭亮守喪不去夏門
亭長呵之李賢注夏門洛陽北面西頭門也

謹案漢自縣尉以下各置小吏謂之鄉官五家爲伍十
家爲什百家爲里里有魁以相簡察十里爲亭亭有長
以求捕盜賊十亭爲鄉鄉有游徼掌徼巡禁司姦盜

漢書百官志長安雒陽二縣雖在京師而其制並同故史有

長安游徼及亭長里正之名其後北魏置里宰里尉里

正隋置里司官以典領都城諸坊蓋即沿襲此制而設

是長安游徼正如今之兵馬司吏目而亭長里正則如

今之五城總甲也北魏隋里正里司有秩如今吏目說詳後

漢書百官公卿表京兆尹屬官有長安市兩令丞又左馮

翊長安四市長丞皆屬焉

後漢書百官志雒陽市長漢官曰市長一人秩四百石丞一人二百石明法補中興

屬河南尹

謹案漢之長安雒陽市令城市市長丞實本於周官司市

當主辨物平價而參考諸史則其職亦得司捕治如後

漢書張酺傳寶景家人擊傷市卒吏捕得之景怒遣緹

騎疾海等五百人毆傷市丞又周榮傳注引蔡質漢儀

京師游俠發順帝陵賣御物於市市長追捕不得是皆

有搏執姦盜之責案三輔黃圖長安市有九各方二百

六十六步六市在道西三市在道東凡四里為一市市

樓皆重屋又長安閭里一百六十重居櫛比門巷修直

蓋市各有地為市令所專治故所犯在市者市令丞主

之若所犯在閭里者則四尉及游徼亭長主之也今並

互著於此

三國

文獻通考後漢洛陽有四尉魏因之

〔三國吳志孫皓列傳〕皓愛妾或使人至市劫奪百姓財物
司市中郎將陳聲繩之以法

謹案吳志潘璋傳稱璋為吳大市刺姦盜賊斷絕則吳
時市長亦有捕盜之職如漢東京舊制故攘奪財物者
司市中郎將得以法繩治也

晉

〔晉書職官志〕洛陽縣置六部尉江左以後建康亦置六部
尉

〔晉書地理志〕洛陽置尉五部
謹案晉職官志稱洛陽六尉而地理志又作五尉殆本
先後增置故其數互見作史者各據其所本書之以致

參差不合耳

宋齊梁陳

〔通典〕晉建康六部尉宋齊梁陳皆因之

謹案江左稱建康尉為尉司南史齊豫章王嶷傳嶷為
揚州刺史上嘗出新林苑同輦夜歸至宮門辭出帝曰
今夜行無使為尉司所呵也嶷對曰京輦之內皆屬臣
州願陛下不垂過慮據此則當時六部尉司實分掌徼
巡詰禁之事正如今之五城兵馬司也

北魏

〔魏書甄琛列傳〕琛遷河南尹表曰京邑是四方之本不可
不治國家居代患多盜竊世祖太武皇帝親自發憤廣置

主司里宰皆以令長及五等散男有經略者乃得爲之又
多置吏士爲其羽翼崇而重之始得禁止今遷都以來天
下轉廣四遠赴會事過代都五方雜沓難可備簡寇盜公
行劫害不絕此由諸方混雜釐比不精主司闇弱不堪檢
察故也凡攻堅木者必爲擇良器河南郡是陛下天山堅
木盤根錯節亂植其中六部里尉卽攻堅之利器非貞剛
精銳無以治之今里正乃流外四品輕職任碎多是下才
人懷苟且不能督察故使盜得容姦百賦失理邊外小縣
所領不過百戶而令長皆以將軍居之京邑諸坊大者或
千戶五百戶其中或王公卿尹貴勢姻戚豪猾僕隸蔭養
姦徒高門邃宇不可干問又有州郡使客蔭結貴游附黨

連羣陰爲市劫比之邊縣難易不同今難彼易此實爲未
愜王者立法隨時從宜請取武官中八品將軍以下幹用
貞濟者以本官俸恤領里尉之任各食其祿高者領六部
尉中者領經途尉下者領里正不爾請少高里尉之品選
下品中應選者進而爲之則督責有所輦轂可清詔曰里
正可進至勳品經途從九品六部尉正九品諸職中簡取
何必須武人也

謹案據甄琛傳所言則北魏亦仍晉制洛陽置六部尉
惟經途尉前代未見爲當時所勅置而里正在漢本鄉
吏魏於諸職中簡取則亦改爲選人矣以今制準之六
部尉當爲正指揮之職經途尉當爲副指揮之職里正

當為吏目之職至琛表請以八品將軍以下為里尉者
蓋魏世以雜號將軍為散秩於百官之外別為班品故
得試領他官也

北齊

隋書百官志後齊清都郡鄴領右部南部西部三尉又領
十二行經途尉凡一百三十五里置正臨漳領左部東
部二尉左部管九行經途尉凡一百一十四里置正成
安領後部北部二尉後部管十一行經途尉凡七十四里
里置正
謹案北齊都鄴臨漳成安三縣俱治京城故分置七
尉亦沿晉魏舊制也

後周 無考

隋

隋書百官志隋每坊置坊主一人佐二人煬帝三年京都
坊改為里皆省除里司官以主其事

謹案北魏京城里巷始以坊名至隋而坊主坊佐里司
官遂以入銜實為今司坊官所自昉也

唐

舊唐書職官志殿中侍御史凡兩京城內則分知左右巡
各察其所巡之內有不法之事

新唐書百官志監察御史分左右巡糾察違失左巡知京
城內右巡知京城外盡雍洛二州之境月一代將晦即巡

刑部大理東西徒坊金吾縣獄蒐狩則監圍察斷絕失禽者其後以殿中掌左右巡

通典監察御史分左右巡糾察違失以承天朱雀街爲界每月一代開元中革以殿中掌左右巡監察或權掌之非本任也

唐會要貞元十年勅准六典殿中侍御史兩京城分知左右巡察其不法之事謂左降流移停匿不去及妖訛宿宵捕博盜竊獄訟冤濫賦歛違法如此之類方合奏聞比者因循務求細事既甚煩碎頗失大猷宜令自今以後據六典合舉之事所司有隱蔽者卽具奏聞其餘常務不須處問

舊唐書代宗本紀大厯八年九月晉州男子郇模哭於東市請進三十字上召見館之禁中貶左巡使殿中侍御史楊護以其抑郇模而不上聞也

趙璘因話錄權實子範爲殿中侍御史知巡有小吏從市求取者事發笞臀十數他日復有如此者白於臺長杖背十五同列疑其罪同罰異權對曰前吏所取者名屬左軍臺之威令不振久矣百司尚有不稟奉者況憑禁軍之勢耶彼受賄於此輩且是知抑豪強可以末減後吏則挾臺之威恐嚇百姓杖背全命猶爲至輕

胡三省資治通鑑註程大昌雍錄曰長安四郭之內縱橫皆十坊大率當爲百坊亦有一面不啻十坊者故六典曰

一百一十坊也坊皆有垣有門隨晝夜鼓聲以行啟閉巡使掌左右街百坊之內謹啟閉徼巡者也宋白曰廣德二年九月命御史中丞兼戶部侍郎王延昌充左巡使御史中丞源休充右巡使辛亥源休充都左右巡使元和八年薛存誠奏得兩巡御史狀以承平舊例兩街本屬臺司其所由每月衙集動靜申報如所報差繆舉勘悉在臺中

通典赤縣尉置六員

因話錄萬年縣捕賊官李鎔

冊府元龜萬年長安兩縣捕賊官領其徒受羅立言指使謹案唐以御史知左右巡卽今巡城御史所自始據因話錄載柳公權爲京兆尹於街中杖殺神策軍小將憲

宗詰其何不奏公權曰臣合決不合奏上曰合何人奏對曰在街中本街使金吾將軍奏若在坊內左右巡使奏云云是當時都城各分地界以兩街屬金吾街使而左右巡使但主諸坊之內然考胡三省通鑑註所云則兩街亦臺司所並屬矣至唐以殿中監察知左右巡廣德中至以中丞爲之則其職益重而所轄官吏不見於史文案唐萬年長安二尉稱爲捕賊官各領邏卒卽如今兵馬司之捕役疑亦當統屬於兩巡使也

五季 無考

宋

宋史職官志咸平四年以御史二人充左右巡使分糾不

如法者文官右巡主之武官左巡主之分其職掌糾其違失○開封府左右軍巡使判官各二人分掌京城爭鬪及推鞠之事左右廂公事幹當官四人掌檢覆推問凡鬪訟事輕者聽論決○臨安府城外內分南北左右廂各置廂官以聽民之訟訴許奏辟京朝官親民資序人充後以臣僚言罷城內兩廂官惟城外置焉又分使臣十一員以緝捕在城盜賊

謹案宋志軍巡判官分掌京城爭鬪及推鞠之事據魏泰東軒筆錄載有孫良孺爲軍巡判官押辟囚棄市一事則軍巡判官又有監刑之事與今大決之事五城司坊官畢至例同

李壽續資治通鑑長編大中祥符元年置京新城外八廂真宗以都門之外居民頗多舊例惟赤縣尉主其事至是特置廂吏命京府統之天禧五年增置九廂熙寧三年五月詔以京朝官曾歷通判知縣者四人分治京城四廂凡民有鬪訟事輕者得以決遣

文獻通考熙寧三年以京朝官分治開封府四廂其先差使臣並罷九月詔許畱後使臣一員分左右廂管勾十一月臣僚言逐廂一月之內斷決事件不多欲止令京朝官二員分領二廂決斷所舊來四廂使仍舊存畱以備諸般差使元祐四年知開封謝景溫請於新城內外左右置二廂通爲四廂四年罷紹聖元年復置紹興中臨安府先依

開封例於城外南北廂置主管公事近又於城內左右廂添置官二員分減在城詞訟其後以臣僚言將在城左右廂廢罷其廂官二員移往城南北廂

謹案宋真宗以赤縣尉不足彈壓始特置廂吏是宋之四廂使即前代六部尉之職正如今之五城兵馬司也

遼

使 [遼史百官志] 五京警巡院職名某京警巡使某京警巡副

王圻續文獻通考 [遼五京各置警巡院官曰警巡使東京別置軍巡院官曰東京軍巡使中京別置巡邏司官曰中京巡邏使興宗重熙十三年又置契丹警巡院

謹案遼於京城置警巡院軍巡院蓋本沿唐末節鎮牙職之稱而所掌實即唐左右巡之事歷代職名沿革至此而漸變其舊矣

金

[金史百官志] 諸京警巡院使一員正六品掌平理獄訟警察別部總判院事副一員從七品掌警巡之事判官二員正九品掌檢稽失籤判院事。武衛軍都指揮使司都指揮使從三品大定十九年以武衛軍六十人兵馬一員副都二員其職低故設使品正四承安三年陞副都指揮使二員副都一員判官一員掌防衛都城警捕盜賊

謹案金之警巡使副悉循遼制當如今之五城而武衛

軍則本隸兵部當如今巡捕五營之比然其官初設有兵馬一員則兵馬司之名實自此始今故並著於表焉
〔元〕好問中州集張德直召補省掾選授右警巡使李天翼遷右警巡使李獻甫兼右警巡使
謹案金史百官志警巡使無左右之名惟使副各一員而張德直李天翼等皆嘗爲右警巡使疑卽警巡院副之別名也

元

〔元史百官志〕大都路兵馬都指揮使司凡二掌京城盜賊姦僞鞫捕之事都指揮使二員副指揮使五員知事一員提控案牘一員吏十四人至元九年改千戶所爲兵馬司

隸大都路凡刑名則隸宗正且爲宗正之屬二十九年置都指揮使等官其後因之一置司於北城一置司於南城司獄司凡三司獄一員獄丞一員一置大都路一置北城兵馬司皇慶元年分置一司於南城○左右警巡二院達嚕噶齊解見吏部篇各一員使各一員副使判官各三員典史各三員司吏各二十五人至元六年置領民事及供需大都警巡院品職分置如左右院達嚕噶齊一員使一員副使判官二員典史二員司吏二十人大德九年置以治都城之南○上都兵馬司指揮使三員副指揮使二員知事一員提控案牘一員司吏八人至元二十九年置警巡院達嚕噶齊一員警巡使一員副使二員判官二員司吏八

人

謹案元仍金制分警巡院爲三兵馬司爲二以參掌都城民事及姦盜鞠捕其兵馬司本屬右選當如今之巡捕營而南城北城之名實肇昉於此時洎明初裁省警巡院併入兵馬司又增置東中西三城而指揮副指揮遂設爲文職之定名矣

明

〔明史百官志〕監察御史巡視皇城五城

〔王圻續文獻通考〕明警巡改置中東西南北城兵馬指揮司初設兵馬指揮司指揮使副指揮知事城門設兵馬洪武十年改爲指揮副指揮革知事二十三年定爲兵馬指

大四百二十六

揮司增設吏目建文中又改指揮副指揮爲兵馬副兵馬靖難後復故本司各指揮一人副指揮五人指揮掌巡捕盜賊街道溝渠囚犯火禁之事副指揮爲之貳

〔明會要〕正統十三年令五城巡視御史凡事有姦弊聽其依法受理送問成化四年令錦衣衛五城兵馬司禁約賭博緝捕盜賊巡城御史通行提調凡九門守門官軍及九門鈔法俱巡視北城御史管帶提督整理清到軍士北城御史同給事中兵部委官存恤盔甲廠東城御史同給事中巡視

